

Pabloa Timoteodsa ima teppe tahidecca dosse inajaro

1 Timoteo

Timoteopa dsabisso tojapohuidsama Jesodsa jehe najari. Pablo huatimade tojadsapa pohuadsa ccaccaridsa najari. Pablo Timoteo mari icanadsa Jesodsa jehe najari, quinahi nade. Nama najaria Pablo Timoteodsa: –Occa ejedenissa nahi –nanaja najari. Pablodsa ccaridsajarijine Jeso tahimari tohuattahissa tajari. Dsama onihi, onihihuaji huedaridsadsa Jeso-cristo tahimari icassiejeranijinecca mamariri naridsajari.

Odsa panani Epesohuaji tohuedadsapa nahidsa Pablo Timoteo inebojari, pohuadeni maride tojahijine. Dsotodena ajijaro ima teppe pohuadsa dosse inajaro. Diodsa dsepe ijihissa tahijine dsodo inajaro. Jesodsa jehe quinajari maridedeni bicaqquri najarira icattejidsa-baqquihijine dsodo inajaro. Mamaridedeni biji accodedeni icattejidsa-baqquihijine naco dsodo inajaro. Najarideni nejecoma quinahijinecca ima pohuadsa dsodo inajaro.

Pablo nija najari

1 ¹⁻² ¿Nija Timoteo? Ohua Pablo tiadsa occa ima dsodo onajaro. Jesocristocca dodosse ojani. Dio Atti mari ocanabaqquiridsahijinepa Abi Dio, Pohua Bedi Jesocristo tedseje ohua dosse quinajaro. Diopa ia Tonassajade, Pohua Bedi Jesocristopa itohui ccanipomahijine pohuatohui imadijaro.

Jehe Timoteo, Jesocristodsa jehe tadsapi pajissa pina occa ejedenissa tajaro. Nadsapi icca Abi Dio, ia Medsede Jesocristo tedseje tiadsa ima bicani inanamanana. Poccadeni tohuati huanehema tia acco icamanana. Poccadeni jonehe naqui tiadsa tojana, onajaro.

Maidsehecca mamaridedeni apaja quinahijine

³ Jehe Timoteo, tahide Masedoniahuaji occabote nadsa tiadsa huati onajaropi jidapana dsodo onapomajaro. Aji, odsa panani Epesodsa timadiccaji, marinaja maidsehecca mamaridedeni huati ticanabaqquina, denima mari quina-jarahijine, onajarode. ⁴ Madija ima jadani tohuini pohuadeni bodidsa huahuatomacca dsanapomanajarahijine, pohuadeni potapojari tahimarideni tohuini naco bodideni huahuatomacca dsanapomanajarahijine huati ticanabaqquina, onajaro. Najaro imatohui disseraqquri nadsa pohuama ahuaji huati ahuaji huati quinadsapa

cahadirere cacana najari. Ima nema naniccapi Diocca pajissehdsasacco toquinahijine ia acco cama-jerani. Madijapa Diocca pajissehe aji Dio ia tonassajabaquihijineccadsa bacco toquinahijinepa Jesocristodsa pajissa quinadsana bacco toquina-hitohui.

⁵Jehe Timoteo, tiadsa dsodo onajaropi Diodsa toquejenajarideni huapima huatideni cahanerara canaridsahijine. Najaro tohuati huanehepi ibodi bicaququiri nadsa, ibodi ima bicani tohuira inadsa Diodsa pajissara jehe inanissa tadsapi eti cahanerara canaridsanijine, onajaro. ⁶Naraha madija motadenipa najaro ima bicani nebo-manajari. Manaco ima ponimaccara imahaha imahaha cacana najari. ⁷Pohuadenipa: –Diocca dosseniji maride iquejenana –quinadsapa cappineraququiri nadsa mari mari quinaraha poccadeni marinaja tomittanimana-jarajari.

⁸Dio pocca dosseniji Moisesidsa da inajaropi bica tani nahatoququiri inajaro. Najaropi imadinissa tanijinecca marinaja. Mamaridenipa Diocca dossenijidsa mari quinahissa tajarodsa iboraququiri inadsapibica tani, onajaro. ⁹Naraha Dio pocca dosseniji da inajaropi aja madimanhissa tajaridenicca imajine jerani. Aja tabaccoraququiri najaridenicca imajinena pocca dosseniji da inajaro, poccadeni tabaccorehe ahuato inananijine. Aja tabaccoraququiri najaridenipa pina: Diocca dossenijidsa iboququiri najarideni, huaribodeni sibaququiri najarideni, Diodsa nacasseraququiri najarideni, imasiri inanamanajarodeni, Dio noppine cappinamana-jarajarideni, Dio

onidsa jajajidede rajarideni. Najaro tabaccorehe ahuato tanijine Dio pocca dosseniji da inajaro. Madija ohuahadeni naco pina poccadeni abi inanadsoqque-manajarideni, poccadeni ami inanadsoqque-manajarodeni, madija ohuahadeni inanadsoqque-manajarideni. ¹⁰Aja huananehe inanamanajarodeni, pina pocca amoneje jeraraha tohuini dissera tajari, ponicca maququiri jararaha tohui dissera tajaro. Maququidejeraha pohua tesse dsoto ajade dissera tajari, amoneje naquqiriponi tassani bequede dissera tajaro. Najaro tabaccorehe huapima ahuato tanijine Dio pocca dosseniji da inajaro. Madija ohuahadeni naco pina madija ibotibaququimanadsa madija ohuahacca dodosse toquejenahijine manaconitohui da iquimabaququimanajarideni, mamaisadedeni, ima cacattemade baccuhuaji domo huadsa ima maidsehera huati toquinajarideni. Jehe, madija nama-jidede rajaricca imajine Dio pocca dosseniji da inajaro. Najaridenipa imadinissa tanijinecca marinaja bicanidsa iboququiri nadsapa ima oppina taniccara ihinanamana najaro. ¹¹Jehe, najaro marinaja bicabotepi Jesocristo tahimari icassiejeranijinecca tadsajani ojariququijaro. Abi Dio Bicabote deni tojararipa pocca dosseniji ohua cadossejaride, madija mari ocana-baququiridsahijine, onajaro.

**Jesocristocca tohuati
huanehe Pablodsa tojadsapi
Pablo huatidsejari**

¹²Ohuapi ia Medsede Jesocristodsa: Jehe, tijine bica tani, onajaro. Aji pohua tahimari maride

occaridsanjine ohuadsa pocca dacorehe inanadsapi ohuatidsejaro. Jehe, pohua attidsa ibora onanjine nahato tapodsapa ohua dosse tajari. ¹³Ohuapi tahide pohuadsa tabaccora onaraha nema nehe pocca tohuati huanehe ohuadsa ahuateo inanjaro. Tahide Jesocristodsa ojajera-ccadsapi pohua tahimari jicanijine tohuini onadsa ohuatti tabaccora taniccadsa huati huati onade. Pocca madija naco ohonajidsobaquui naccade. Pohua onidsa tatamasso ohonaccade. Bica onejeraraha Diopa ohuadsa huati huana tadsa occa tabaccorehe manaconi ohua najidso-jarajari. Jesocristodsa jehe onejeraccadsa tabaccorehe onanaridsani ssamo onaccadsa Dio ohuadsa nama najari. ¹⁴Nadsapi ia Medsede Dio pocca tohuati huanehe motarehe ohuadsa inanjaro. Pohuajine naqui Jesocristodsa jehe onanjine opajirajaro. Pohuajine pocca tohuati huanehe ohuadsa inanadsa naqui Pohuatohui ohuati huana tanijine opajirajaro.

¹⁵Ajjjaro imapi pajissa tojani. Najaro imadsa madija huapima pajissa quinadsapa bica tani. Najaro imapi ajima najaro: Jesocristopa ajjaro namidsa ccaronajari, madija imasiri tonanamajari-deni inassiajabaquihijine. Madija huapimapa imasiri inanaridsamanagera ohuana denima ojine tabaccora tani onanajarode. ¹⁶Naraha Dio ohuadsa huati huana tadsa ohua najidso-jarajari. Ohuapi imasiri ssejide ojiraraha Jesocristopa occa imasiri *mohuaradsa inahanajonajaro. Occa imasiri epeje inanajaropi madija huapimadsa pocca tohuati huanehe ahuateo inanapojaro.

Nadsapa dsotodedenicca: – Jehe, Cristopa icca imasiri epeje inananijine jipa tahi –quinahijine. Najari-deni Jesocristodsa jehe quinadsapa camittehe jiquejeranicca cajimanagera hitohui. ¹⁷Abi Diopa icca tamine deni tojahi. Pohuapa jicaquera tahi, dsoqqequera tahi, ahuateo tahi. Pohuapa Dio ojari najari. Huajijiradsa ettipi Pohuadsa: –¡Epeje, Tiapi bica tinani! ¡Ticca deni tojehe nema dsanapona! –ihidsanapo nana, onajaro. Pajissa nema nana.

¹⁸Jehe Timoteo, tiapi pina occa ejedenissa tajarode. Ajidsa anipodsa Dio Corimejine Dio Atti huati toqqumadedenipa Diodsa tidsepe ijiniyecca ima huati toquinapodsa omittade. Poccadeni huatinaja tinapajiranissa tanijinepi Diodsa tidsepe ijinnissa tana. Pina soldadossa taji. Tabaccorehe tadsajani ticahadire-nijine daco tijiraji. ¹⁹Jesodsara jehe tidsanapoji. Tibodicca ima bicani huahuatoma najarora tinanadsanapoji. Madija motapa nama quinahijine iboquuri najari. Pahuadeni bodideni huatohue bicanicca ettajomanadsapi tabaccorehera tohuini quinadsapa poccadeni jeheniji tossamojaro. ²⁰Nama quinajaridenipa huapi taraha pamahana onideni dsodo onajari: Imeneo, Arejadro quinajaridenina Dio onidsa tatamasso quinajari. Nama-jidede radsapa imasiri jinede Satanadsa onanabaquiniari, Dio oni tamassode oppina tani tochattehahijine.

**Diodsa huatide
toquejenahijinepa
ajama quinana**

2 ¹Timoteo, Jesodsa jehe quinajarideni tedseje Diodsa huati tiquinadsapi ajima tiquinana,

onajaro. Tahidepi madija huapima-tohui Diodsa huati huati titiquina naji. Pohuadeni cappiramanahicca cajimanahijine, Dio pohuadeni ecahuabaquihijine, pohuadeni acco icamabaquihijine naco huati huati tiquinaji. Pohuadsa huati tiquinadsa naqui: –Jehe Abi Dio, tijine bica tani –titiquina naji, onajaro. ²Dsama huapimacca taminedeni-tohui naqui Diodsa huati huati tiquinaji. Aja tamine deni toquejenajaridenitohui, tamine ohuahadenitohui naqui Diodsa huati huati tiquinaji. Poccadeni cacahuehe bica taniccara inanamanadsapi icca dsamadsa ima oppina tanicca nohueranijine. Ia naqui mohuara-dsa imadidsa Diodsa iboraququiri inadsapi madija ohuahadeni icca madie bica tani qqui toquinahijine. ³Diodsa huati huati inanipi bica tani. Ia Tonassiajade Dio huatidse tahi. ⁴Pohuapa madija huapima tocassiejerahijine tohuini najari. Pocca pajissehe tocahatterahijine naco tohuini najari. ⁵Diopa ojarijari. Pina pohuassa najari ohuaha nohuerahi. Icca ima Pohuadsa tobicanijinepi icca ima tonanabicade madija ojaria anihi. Madija ohuaha pina pohuassa najari nohuerahi. Najaria aja Jesocristopaja. ⁶Jesocristopa dsoqquehijine pohua ccaccoradsa icca imasiri manaconi dsoqquejari. Najaro ima madija huapima mittaridsamanahijine Diojine ahuato inanadsa pajissa tojajaro, aji Diojine najoraponicca huada bacco tadsa, onajaro. ⁷Najaropi Jeso pohua tahimari ohuacomera-ridsanijine otohui huahua nadsapa pohuajine pocca dodosse ojajaro. Jodio

quejena-jarajarideni pohua tahimaridsa pajissa quinahijine, pocca pajissehedsa naco jehe quinahijine mari ocanaridsabaquihijine ohua dosse tajari. Pajissehera dsodo onajaro, omaidsa-gerani.

⁸Jehe, nadsama maqquidejedensihuati ajima onani: Madija Diodsa totoqueriqqumana nahihuaji toqueriqquidsapa Diodsa huati huati totoquina nana, onajaro. Diotohuira quinajari bodideni naco huireququiri najarina pohuadeni dsepe memehujaji Diodsa da tamacossamanana, onajaro. Huadie jirehe Diodsa huati huati totoquina nahijine, madija ohuaha tedseje naco ahujaji atti ahujaji atti quina-jaradsana Diodsa huati huati totoquina nana, onajaro.

⁹Nadsama amonejedensihuati dsodo onajaro. Ponidenicca etero huedsamananicca imapi ajima najaro: Etero bica tanicca huedsamananipi bica tani. Naraha etero huatini ccara taniccapi huedsamana-gerana. Etero onihi naqui pina ponideni imani ahuato tanicca huedsamana-gerana. Ponideni tatini conani naqui icohuamanajerana. Tomattocca dsibehi tanicca oro, huatini ccara tanicca *perla naqui mattonideni huana-dsapi jipera onani. Bicabote tohuini quinadsa ponideni bodinipi: –Ohuqqui toquinadsa: “Amoneje bicani” quinahijine –quinaraha najaropi Diodsa bica tejerani. ¹⁰Amoneje attinidenipi: –Jehe, ohuapi Diocca ojani –quinajarodeni Dio Pohuadsa bicaququiri nanijinepi ajima quinana: Ima bicanira inanaridsamanadsana bica tani. ¹¹Jehe, amonejedeni Dio Atti mittamananijinepi

didi quinadsa taharibobo canana. Dio Atti maride attidenidsa naqui iboraquiquiri nana, onajaro. ¹² Ohuatti onihi naqui: Amonejepi madija huapima queriquimanahidsa maride toja-jerana, onajaro. Amonejepi maquidejedenidsa deni toja-jerana. ¡Poni! Pina taharibo canadsa Dio Atti mittanissa tanijine, onajaro. ¹³ Ohuatti nema onajaropi Diopa Adana inahatopojari. Dsotodena Eba inahatojaro. ¹⁴ Adanapa Satanacca maidsehedsa tojapo-jarajari. Ebanapa pocca maidsehedsa tojapojararo. Ponipi Dio Attidsa ibora tejeradsapi imasiri inanajaro. ¹⁵ Nema najaroa amonejedeni ejedeni tocassonamandsapi ocasserani ihinahanamana naraha Diopa amonejedeni inassijabaquinitohui. Jehe, ponideni tocassiejeranijinepi Diodsa jehe dsanapomanana. Madija huapimadsa huatinideni huanacquiri nana. Ima jirehe Diodsa madimananissa tana. Mohuaradsa ima bicanira ihinanamana nana. Nema quina dsapi tocassiejeranitohui, onajaro.

**Jesodsa jehe quinajarideni
cacahuade toquejenahijinepa
ajama quinahijine**

3 ¹ Jehe, ima onihi pajissaccapi ajima najaro: Madija attipa: –Jehe, *Jesodsa jehe quinajarideni cacahuade ojanijine tohuini onani –nadsapa cacahuete bicani tohuini najari. ² Nama nadsapa Jesodsa jehe quinajarideni cacahuadecca madie ajima nanina bica tani: Pahuapa madihissa tadsapa madija ohuaha attidenipa: –Pocca ima tabaccora tani –quina-jarahijine. Pocca amoneje naqui ojarini cajihijine.

Huananehema madi-jarahijine. Nadsama huajijiradsa pohua bodi huatohuissa tana. Imasiri inajeranijine pohua cacahuade nahato, madide naco nahato tadsapa pohuadsa madija ohuaha attidenipa: –Pahuapa bica tahi, ima cappirahi –quiquinanahijine. Pahuadsa madija bacca najonadsa pohuadsa dsamatapa da inahijine, pocca odsadsa huadahijine naco bodi nanajorapo nana. Dio Atti maride naco nahato tana. ³ Dsedse coma tanicca dsejide rajarana. Pohua tesse naco inajidsojarana. Johuahuera tadsa jone taha madihijine. Dsiniro huemani tohuini, todsepetaji huemani tohuini dissera tajarana. ⁴ Pahuapa pocca odsacca madija cacahuade nahato tana. Pohua attidsa pocca ejedenideni naco iboraquiquiri nahijine. Pocca ejedenidenipa pohua noppine cappinaquiquiri nadsa madimanahissa tahijine. ⁵ Naraha pocca odsacca madija cacahuade ssamo tadsapa ¿Diocca madija cacahuade nahato taco? Ssamo tahi. ⁶ Jesodsa jehe quinajarideni cacahuade toja-hijinepa madija Jesodsa jehe dsatipa pohua. Nama nadsapa pohua atti: –Ohuana deni ojani –narana. Nama nadsapa manaco Diopa inajidsorana. Pina maittaccadsama Diodsa *Satana attipa: –Ohuana deni ojararo, tiapi ajimani tijani –napojarissa najarahijine. ⁷ Nadsapa Jesodsa jehe quinajarideni cacahuade tojahijinepa pohua tahimari tocanissa tadsapi Jesodsa jehe quina-jarajarideni attidenipa: –Jehe, pahuapa madija bicahi, ima cappirahi –quinahijine. Naraha pocca madie nema nejeradsapi jehe

quina-jarajarideni attidenipa: –A, pohnuapa Jesodsa jehe quinajarideni cacahuaderaha pocca ima tabaccora tani –quinahitohui. Nadsama pohnuajine pocca ima nema nadsapi pohnuapa pina Satanacca maidsehedsa cobara tajarissa najari.

**Jesodsa jehe quinajarideni
cacahuade biji accodedeni
toquejenahijinepa
ajama quinahijine**

⁸ Jehe, Jesodsa jehe quinajarideni cacahuade biji accodedeni naco madija bicaququiri najarina ticattejidsabaququina. Madija attideni pohnuadenidsa: –Bicaququiri nahi, madimanahissa tahi –quiquina-nadsapa pohnuadeni attidsa naco iboraququiri nahijine. Pohnuadenipa maidseraququiri nahijine, attideni bica taniccara huati huati toquinahijine. Dsedse coma tanicca dsejidede rajarana. Dsiniro huemani tohuini disseraququiri najarana, maidsehedsa dsiniro denima cajimanahijine tohuini quina-jarana.

⁹ Pohnuadeni bodi huireququiri nadsa Diocca pajissehedsa pajissa quinahissa tana. Najaro pajissacca imapi tahide ssamoququiri inaporaaha jidapanana Djojine ahuato inanaridsajaro. ¹⁰ Naraha madija ticattejidsabaquququjaraccadsama pohnuadeni tinocodsabaququipojo. –¿Nejecojarina Jesodsa jehe quinajarideni cacahuade biji accode toquejenahijine pajirahi? –tana. Bicaququiri nadsapa apaja, Jesodsa jehe quinajarideni cacahuade biji accode toquejenahijine bica tani.

¹¹ Najarossa najaro bedimenideni naqui bicaququiri nanijine. Nadsapi madija ohuahadeni ponidenidsa:

–Jehe, bicaququiri nani, madimananissa tani –quiquinana-hijine. Ima ponimacca naqui huati huati nanaridsamana nejeranijine. Bodinideni huato-mananissa tehe madimanana. Ponideni attini naqui maidseraququiri nani, huapima inapajiramananissa tanipi bica tani. ¹² Nadsama Jesodsa jehe quinajarideni cacahuade biji accodedeni naco poccadeni amoneje ohojariri nanina bica tani. Nadsapi pohnuadenidsa huananehe tahimarininohueranijine. Poccadeni ejedenideni, poccadeni odsacca cacahuade nahatoququiri nana. ¹³ Nadsapa Jesodsa jehe quinajarideni cacahuade biji accodedeni tarabaidsa quinahissatadsapa madija mota attidenipa: –Pohnuadenijine bica tani –quinahijine. Nama quinadsapa madijapa pohnuadeni attidenidsa iboraququiri nahijine. Nadsama poccadeni tarabaidsa toccanissa tadsapi poccadeni jeheniji Jesocristodsa todacorani nanijine, cappinerehe naqui cajimanahijine.

**Djojine Jesocristo tahimari
pajissacca iadsa ahuato tajaro**

¹⁴ Jehe Timoteo, nani tia qquide occabote nani onaraha tahidepi ohuattira tiadsa dsodo onapojaro. ¹⁵ Nadsama tiahujaji occanijine denima onajodsapi occa imara qqutinadsa aja Jesodsa jehe quinajarideni madimanahissa tahijinecca ima nahato tinanijine. Aji ia Diocca madija iquejenajaropi Dio camitta tajaridsa ihiqueriququi najaro. Dio pocca pajissehe iadsa inanajaropi johuidso tejeranijine ecahuanissa tajaro. Nadsapi madija huapima Diocca pajissehedsa mari

icanabaquihissa tajari. ¹⁶Jehe, pocca pajissehepi bica tani, deni tojani, inajaro. Tahidepi iadsa ahuatora taporaha jidapanana iadsa ahuato tajaro. Najaropi Jesocristo tahimaripaji. Najarodsa pajissa inajaro. Pina jiri jiri inajarossa najaro:

Pohuapa assire tojadsapa pina madija iassa naha tojajari.

Iadsa Dio Corime Attipa: –Dio Bedipa Imehi Attidsa ibora tajari. Pohuapa Imehidsa pocca ima inapajiranissa tajaro –najari.

Diocca dodosse tabaqqi memehuaajicca naco Dio Bedi qui toquinahi.

Najari tahimari madija huapimadsa ecomeraridsajaro.

Nadsama ajiaro dsamadsa madimanajarideni pohua tahimaridsa pajissa quinajari.

Pohua naco Djojine memehuaji toccamacossanijari.

**Mamaidsadedenicca
marinaja imitta-jerana**

4 ¹Dio Corimecca marinaja iadsa ahuato inajaropi ajima najaro: Nidsa dsotode Jesocristodsa jehe quinajarideni motapa jehenijirideni tomijiradsapi Diocca pajissehe inebomananitohui. Mamaidsadedeni attidenidsana iboraqqiri nahitohui. Naraha najaro mamaidsadedenicca marinajapi Satanacca dodosse tocorimededenicca marinaja. ²Aja mamaidsadedenipa poccadeni marinaja pina pajissassa naraha maidsa maidsa quinajari. Poccadeni tabacorehejine pohuadeni bodideni ccaracossa-ridsamanajari. ³Ajina mamaidsadedenicca

marinajapi: –Cajicajipi poni –quiquinanajari. –Jijipa naco motapa oppina tahi, tijipamana tejeraji –quiquinanajari. Naraha najaro marinajapi pajissa jerani, tabaccora tani. Dsamatapa, bani huapimapa Dio inahatoridsajari. Jesocristodsa jehe inajaropi Diocca pajissehe nahatoqqiri inajaro. Nadsapa iadsa jijipa oppina tahicca nohuerahi. Diodsa ettipi: –Jehe, epejeni Abi Dio, ticca daniji ijipahijine bica tahi –inadsapi huapima ijipani bica tani. ⁴Diocca nahatonijipa huapima bica tahi. Pohuajine nahatoridsahi ettajo-jarana. Dio iadsa inanadsapi manaco Pohuadsa: –Jehe, ticca daniji iadsa bica tahi –inana. –Jipera onani, oppina tahi –inejerana. ⁵Pocca daniji dsamatapa, bani naco ijipahijinepa Dio Pohuadsa huati inadsa Pohua Attijine icca jijipa tohuiredsapa ijipani bica tahi, onajaro.

**Jesocristocca medse bica
tahijinepa ajama nana**

⁶Jehe Timoteo, aji tiadsa dsodo onajarocca marinajapi imecotedenidsa mari mari taridsadsapi najaro marinajadsa teribo ssiaja tadsa naqui Jesocristocca medse bicahi tjanitohui. Jesocristo tahimari pajissacatohui tibodi huahuatoma dsanapodsapi Diocca marinaja pajissacca tiattapojaro tinebojeradsa naqui ticca jeheniji denima todacorani nanitohui.

⁷Naraha ajiaro namicca ima, tohuatti ponimacca Dio Attissa nejerajaro timittadsapi: –Jehe pajissa –tejerana. Dio Attissa tinananijinepi Pohuatohuira tibodi huahuato nana, Pohuadsara ibora

tinanijine, onajaro. ⁸ Ajana madija tarabadsade dissera tadsapa pohua assire todacora, pohua biji todacora, pohua isso naco todacora tahi. Ccanajabote dsojode naco pajirahitohui. Najarossa najaro ima denima bica tajaropi Diodsa dissera inadsa Pohuadsa icca jeheniji todacoranijine. Najaroa icca madie ajijaro namidsa bica tanijine. Nidsa memehuaji Diodsa imadidsa naqui icca madie denima bica tanijine. ⁹ Ajijaro ima tiadsa dsodo onajaropi pajissa. Najaro ima nemanehedsa madija huapima jehe quinana. – Pajissa jeranitime – quina-jarana, onajaro. ¹⁰ Najarojine ocasserani eraha nema nehe disseraqquri inadsa idsepe ijijaropaji. Abi Dio camitta tajaripa ia tonassiajabaqquihijine tohuini imadijaro. Puhuapa madija huapima Tonassiajade. Puhuadsa jehe quina-jarideni inassiajabaqquihitohui, pajissa.

¹¹ Jehe Timoteo, ajaro ima tiadsa dsodo onajaropi ticca mamari tabaqqui mari ticanabaqquidsa: – ¡Aji occa marinajassa najarora tinanamanaji! – tana, onajaro. ¹² Naraha madija attideni tiadsa: – Dsabisso tijani. Ssamo tinani. ¿Tettidsa iboraqquri inanijinequi? – quinadsapa ticappina-jeraji. Attidenidsa naqui jehe tejerana, onajaro. Manaco ticca madiera denima bica tinanadsa Jesocristodsa jehe quinajarideni qqui toquina-dsapa pina ticca madiessa inanananitothui. Ima bicanira huati huati tinadsapi pohuadeni naco ima bicani huatide tocatterahijine. Madija huapimadsa teti cahanari canadsapi pohuadeni naco tohuati

huanehe tocatterahijine. Diodsa ticca jeheniji dacorani qqui toquinadsapa poccadeni jeheniji todacoranijine. Imasiri tinanajeranijine tia cacahuade nahato tinadsapi pohuadeni naco pohuadeni cacahuade tocatterahijine. ¹³ Tiahuaqi bacco onejeraccadsama ticca mamari tabaqqui titinequeri-qqiubaqqui nadsa pohuadenidsa Dio Atti hua hua tidsanapona. Dio Attidsa iboraqquri nahijine pohuadeni tinahatidsebaqquidsa mari ticana-baqquihissa tajo, onajaro. ¹⁴ Dio Atti maride nahato tinanijine Dio pocca nahatohue tiadsa da najaropi teti ajima tejerana. Najaropi Jesodsa jehe quinajarideni cacahuadedeni titedsejemacca ima tiadsa ecomeramanade. Pohuadeni dsepedsa titatidsa bara quinadsa Diodsa huatide toquejenadsapa tiadsa inanajarode. Najaro Diocca daniji ticajijaropi tinebo tejerana, onajaro.

¹⁵ Jehe Timoteo, ajijaro imassa tinananijine dissera tinaji. Nema tadsapi Diodsa tidsepe ijie tobicadsanapodsapi najaro huapima qqui toquinahijine. ¹⁶ Ticca madie tecahuanissa taji. Dio Atti naqui mari tanissa taji. Nema tidsanapodsapi tia, ticca mamari tabaqquima Diojine ticassiejeranijine, onajaro.

Jesodsa jehe quinajaridenidsa pina ia imecotessa inaridsana

5 ¹ Timoteo, tetti bica tadsa ticca mamari tabaqqui mari ticana-baqquina. Jadahideni ima caji-manadsapa pohuadenidsa johua tejerana. Pina ticca abi noppine ticappinajarossa tadsa mohuara-dsa pohuadenidsa huati tinanissa taji. Dsabissondenidsa naqui pina

timecotedsa huati tinajarossa tadsa mohuaradsa pohuadenidsa huati tinaji. ²Jadanideni mari ticana-baqquidsa naqui pina ticca ami mari ticanajarossa tadsa mohuara-dsa mari ticanabaqquiji. Dsohuato-denidsa naqui pina timecotedsa huati tinajarossa tadsa mohuaradsa ponidenidsa huati tinaji. Ponidenidsa naqui ima tinana-jeraniijinepi tia tecahuanissa taji, onajaro.

**Tabira tocajamanajarodeni
acco icamabaqquinijine**

³Jehe Timoteo, amoneje maqqi dsoqqeajari tabira tocajadsa ponicca madija nohueradsapa bijinideni acco ticamabaqqina, onajaro.

⁴Naraha tabira tocajani bedideni animana, jinodideni animana nadsapa pohuadenina tahide imenideni, midinideni cacahuade tocahatterana. Ajina, ponipi tahide poni bedi, poni jinodideni naco badsiraqqiuri nadsa ecahuabaqqi-pojari. Nadsapi dsotode poni naqui tabira tocajadsa cappira-jeraniijine poni bedideni, jinodideni ponidsa huatideni huanaaqqiuri nana, onajaro. Nema inanamananipi bica tani. Dio naco pohuadenidsa huatidse tahi. ⁵Amoneje tabira tocajamanajarodeni pajissa ponideni accode cappiramanadsapi ponideni bodini: –Dio ohua acco camahitohui –quiquinanajaro. Dsome, ssiaja Diodsa huati huati dsadsanapomana najaro. ⁶Naraha tabira tocajamanajaro motadenipi Dio jirehe madimanajaro. Ponidenipi namicca ima tohui, aji ponideni tohuini quinanicca tohuira madiridsamanadsapi ponidenicca madiepi pina huatiajarossa najaro.

Aji Diocca camittehe jiquejeranicca cappiramanajaro. ⁷Jehe Timoteo, ticca mamari tabaqqi tocahatterahijine najaro ima mari ticana-baqqina. Poccadeni madija amoneje tabira tocajajaro cacahuade tocahatteradsapa madija ohuaha attideni pohuadenidsa: –A, Diocca madijaraha poccadeni madija tabira tocajajaro cacahuade jiperaqqiuri nahi –quina-jarahijine. ⁸Naraha madija pohua pocca madija cacahuade jipera tadsapa bica tejerani. Aja pocca odsadsa madimanajarideni naco ecahuabaqqi-hijine jipera tadsapa pocca jeheniji pina nohuerajarossa najaro. Pocca ima tabaccora tani, pina Jesodsa jehe najarajaricca imassa naraha denima tabaccora tani, onajaro.

⁹Nadsama Jesodsa titiqueriqquimana najarodeni amoneje Jesodsa jehe quinajaro tabira tocajamanajarodeni acco acco titicamaridsabaqquimana nanijinepi oninideni dsodo tiquinaji. Nadsama huajano 60 cajimanajaro, denima huajano cajimanajaro najarodenira oninideni dsodo tiquinaji. Naraha ponidenicca huajano 60 bacco tejera-jaropi oninideni dsodo tiquinejeraji. Nadsama oninideni dsodo tiquinanijinepi ponidenicca madie ajima nanina bica tani: Amoneje tahide ponicca maqqi dsoqqe-jaraccadsama najaridsara madinissa tapojaro. ¹⁰Poni dsapani iijjaropi ima bicani inanaridsani madija huapimadsa ahuato tajaro. Pina ponicca ejedeni inanapihissa tajari, pina ponidsa madija bacco quinadsa naco itapabaqquihijine nanajorapo najaro. Jesodsa jehe quinajarideni acco camade jipa tajaro, amorideni

ssahuade naqui ibora tajaro. Madija nanajidso toquejenajarideni naco acco acco ihicanabaqqi najari. Ima bicanidsa dsapani ijidsanaponijine dissera tajaro. Najarossa najarora oninideni dsodo tiquinaji, onajaro.

¹¹Naraha amoneje ponidenicca huajano ajamani pina 60 bacco tajararaha tabira tocajajaropi oninideni dsodo tiquina tejeraji. Najarodenipi maquideje ohuaha caji-manapomanijine tohuini quinadsapi Cristodsa dsapanideni ijimanajine nebomananitoahui. ¹²Nema quina-jarodenipi tahide attinideni: –Jehe, Cristodsara odsepe ijiniijine –quina-poraha dsotodepi ponideni attinidenissa inanamana-jerajaro. Nadsapi ponidenijine ponidenidsa ima ssonarijaro. ¹³Ponidenipi dsapanideni ijiniijine tohuibomanadsa odsa onihihuaajira qquide jahiridsajidede rajaro. Naraha najaro imaha ojarijerani. Imarinideni onhipi huajijiradsa ima ponimacca huati huati nanaridsamana najaro. Ponidenipi madija ohuahadenicca imadsa ssonacossamanajaro. Ima bica tejeranicca naqui huati toqqumajidede rajaro. ¹⁴Najaro noppineni ohuattipi: Amoneje dsohuato tabira tocajamanajarodenipi maquideje caji-manapomanijine bica tani. Ejedeni naco cajimanapomanijine bica tani. Ponidenicca odsa naqui ecahuananijine bica tani. Ponidenicca madie bica tadsapi iadsa jiperaquiri najaridenipa Jesocristodsa iquejenajarodenidsa ima inassonarimananijine ssamo tani. ¹⁵Nema onajaropi tabira tocajamanajaro motadenipi Jesocristodsa jehe quinaporaha nebomanadsa Satanadsana toquejenajaro.

¹⁶Jehe, nadsama amoneje Jesocristodsa jehe nadsapi ponicca madija tabira tocajamanajaroden deni acco icamanijinepi bica tani. Pina poni midini tabira tocajadsa, imeni tabira tocajadsa, onihideni tabira tocajamanadsa naqui acco icamabaquiniijine bica tani. Nema nadsapi Jesocristodsa quequeriqquimana najarideni ponideni acco camade dsepedeni ijimanajarahijine. Naraha tabira tocajamanajaroden deni bedi cappiramana, bedeni cappiramana, jinodi cappiramana nadsapi najarodenina Jesocristodsa quequeriqquimana najarideni acco acco ihicamabaquimana nanijine, onajaro.

**Jesodsa jehe quinajarideni
cacahuadedenicca
marinaja denima anini**

¹⁷Jehe Timoteo, ima onihi naqui:
*Jesodsa jehe quinajarideni cacahuadedenipa poccadeni cacacahua tabaqqi ecahuabaqqi-manahissas tadsapa pohuadenidsa da da dsadsanapomana nahijine. Dio Atti maride dsepedeni ijimanadsapa pohuadenidsa denima da da dsadsanapomana nana, onajaro. ¹⁸Najarossa najaro Dio Atti dsodnanidsa ajima najaro: –Aroso jidsadsa trigo nocco catojahijine bohui ttai ttai nadsapa bohui bono ssoque tacossamana tajarajo. Pohua naco pocca ttainajadsa jipahijine –napohui nade Dio. Pohua Atti onihi dsodo napojaro naqui: –Tatarabidsadedenipa poccadeni tarabidsa manaconi cacajimana nana –napohui nade. ¹⁹Madija ojararia itide tiadsa huati tadsapa: –Jesodsa jehe

quinajarideni cacahuadepa ima inanani –nadsapa amadsati pajissa tejeraji. Naraha madija pamaha itide, denima huatimade tojari nahitide tiadsa huati toquina-dsapa: –Pajissa inoccodsa qqui inani –quinadsana timittadsa pajissa tana. ²⁰Nadsapa pocca ima nebo-jaradsa Dio Atti mamarihuaji Jesodsa jehe quinajarideni huapima mittamanahijine huati ticanajo. Nema tadsapi tijine huapima imasiri inanamananijine noppineni cappinamanahitohui, onajaro.

²¹Jehe Timoteo, ohuatti Dio mittahi, Pohua Bedi Jesocristo naco mittahi, Dio pocca dodosse tabaqqi toquejenahijine icattejidsabaqquijarideni naco mittamanahi. Nadsapi tiadsa ajima onajaro: Occa marinaja tiadsa dsodo onajaropi nemanehe tecahuanissa taji. Madija ojariadsa teti huana tani ojari nejeraji. Pina titesse ima caji-dsa naco: –Najaripa otesse, huati ocana-jarana –tejeraji. Nama naha huati ticanajo. Madija huapimadsa ima tijine pajiranissa tana, onajaro.

²²Madija Jesodsa jehe quinajarideni cacahuade tojahijine ticattejidsahijinepa tahide pocca ima tibodi huatonissa taji. Amadsati pohuadsa bara tadsa Diodsa huati tinajercana. Aja ticattejidsajari imasiri inanadsapi tiadsa naqui ima ssonarirana. Paji, madija ohuahacca imasiridsa tiquejema tejerana, onajaro.

²³Tiadsa ohuatti onihni naqui: Huajjiradsa tidsona coma tadsapi passo ponira dse tejeraji. Nomi tinanijinepi uva ppejene ssicatahi naco badsira taha dse tana, onajaro.

²⁴Ajjaro ima teti ajima tejeraji: Madija motadenipa imasiri

inanamanadsapi Diocca najidsohuehuaji bacco toquina-jaraccadsama poccadeni imasiri ia huapima nahatoqquri inaponi. Naraha motadenipa ahuatoranidsa imasiri inanamanadsapi huapima ssamoqquri inaccani. Naraha nidsa Dio Pohua baccohuaji huapima idomo huadsana ahuatoranidsa ima inanamanajarocca Diojine ahuato tanitohui. ²⁵Najarossa najaroa ima bicanicca naqui ahuatonidsa inanamanadsapi huapima qqui toquinahi. Naraha ima bicanicca ahuatoranidsa inanamanadsapi nidsaranibote najaro naqui Diojine ahuato tanitohui.

**Madijacca dodosse
toquejenajari Jesodsa jehe
quinajarideni ajama quinana**

6 ¹Jehe Timoteo, *madijacca dodosse toquejenajari Jesodsa jehe quinajaridenidsa ajima onajaro: Tiadeni dossede attidenidsa iboraqquri tiquinaji. Pohuadeni noppine ticappinamanadsa mohuaradsa tiadeni dossededeni attideni tetecomeramana naji. Nema tiquinadsapi tiadeni dossededeni Dio oni itamassomana-jarahitohui. Icca marinajadsa naqui ima inassonarimana-jeranitohui. ²Tiadeni dossededeni Jesodsa jehe quinadsa naco tettidenipi: –A, ohua dossedepa Diocca madija tojadsa ohuemecote tojahi. Pohua attidsa ibora onejerana –tiquinejeraji. Jesocristojine timecote tojajari. Diopa pohuadsa huati huana tahi. Pohuadsa denima bicaqquri tiquinaji. Pohuadsa tarabajadsa tiquinanissa taji. Nema tiquinadsapi timecote acco ticamamanajaripaja.

**Madija maidsehe
mamaridedenipa
ssamoquiri najari**

Jehe Timoteo, ajijaro marinaja ticca mamari tabaqqui tinahatta-baqquihissa tajo, onajaro. ³Aja madija marinaja onihi mari mari najaripa ia Medsede Jesocristo tahimari pajissaccassa nejerajaro mari mari nadsapa pocca mari-najapi maidsehecca. Aji Diodsa imadinissa tanijinecca marinajassa nejerajaro mari mari nadsa naco pocca marinajapi maidsehecca. ⁴Najari maidsehe mamaride pohua bodipa: –Occa marinaja deni tojani. Ohuapi nahato onani –naraha pohua bodipa ssamo tahi. Madija namajide rajaripa madija ohuaha tedseje ima ponimacca ahuaji huati ahuaji huati quina-hijine tohuini najari. Naraha najaro imapi bica tejerani. Pocca ima nema nadsapi pohua tedseje imahaha canajarideni pohuajine pohuadeni tessecca nahatohue acconi cahadirejari, nanacassera canajari, catamassore canajari, pohuadeni bodidenidsa maidsani huahua quinajari. ⁵Pohuadenipa cahadirere cacana najari. Huadieje bodideni tossamomanajari. Diocca pajissehe pohuadenidsa tohuatorajarossa najaro. Pohuadeni bodi naco: –Diodsa iquejenadsapi idsepe ssequiri nanitohui –quinaraha najaropi pajissa jerani.

⁶Diodsa iquejenadsapi manaconi bicani icajini. Naraha najaro manaconipi pina dsiniro imenissa, todsepetajissa nejerani. Najaroa aji Diotohuira dissera inadsapi pocca daniji huemeje huemejereje

naraha najarodsa etidseda: –Jehe, epejeni, bica tani –inajaro. ⁷Ajjijaro dsamadsa issonadsapi idsepetaji jirehe issonajaro. Idsoqquedsa naqui idsepetaji dsojo inejerahitohui.

⁸Nadsapi jidapana imadiccadsama ijipanijine icaji, edsanijine icaji nadsapi najarodsa etidsena, onajaro.

⁹Naraha madija motadenipa dsepedeni ssequiri nahijine tohuira madimanadsapa tabaccorehe inanamana tani. Nama quinadsapa imasiri inanamanadsapi Satanacca maidseheda todsepe toquejenajari-ssa quinajari. Ssamoquiri nadsapa bica tejeranica tohuini, oppina tanicca tohuini, ponimacca tohuini quinajari. Nama quinadsapa pohuadenijine tabaccorehe pohuadenidsa ssonarijaro. Poccadeni ima naqui tossamoridsajaro. Najaridenipa Diocca najidsohuedsa toquejenahitohui.

¹⁰Dsiniro huemani tohuini inacomadsapi tabaccorehe onihi onihi inanaridsa tani. Madija motapa dsiniro tohuini, todsepetaji tohuini quinadsa Diodsa tohuajimanadsapa poccadeni jeheniji inebomanajaro. Pohuadenidsa ocasserehe bacco nadsapi pina boba imedsa jaro canajarissa najaro. Tabaccorehe pohuadeni bodidsa jaro todsimadsapi oji oji dsanapomanajari.

**Jesocristodsa jehe tadsapi
ticca madie ajima nanijine**

¹¹Naraha Timoteo, Diocca madija tijani. Pohuadsa tidsepe ijidsapi ima tabaccora taniccadsa tijajini naji. Ticca madie Diocca dossenijidsa pajiranissa tanijinepi dissera tinaji. Diodsa ibora tinadsapi Jesodsa jehe tidsanaponijine dissera tinaji. Diodsa teti huana, madija huapimadsa

teti huana tanijine naqui dissera tinana. Ocasserehe tiadsa ssonari-raha oji tejeradsa tinahanaji. Jone tinehe timadinijine naqui dissera tinaji. ¹²Ia Medsede Jesocristo tahi-mari deni tojanijine daco tijiraji. Pina madija ittomedsa tahide bacco tapohuijine dissera tajarissa taji. Camittehe jiquejeranicca ticajinijine Dio titohui huahua najaride. Najaro camittehe bacco tinanijine daco tijiraji. Najaroa ima bicani tecomeraridsapodsa huapima mitta-manajaripajade. ¹³Jehe Timoteo, Diopa huapima madiridsamanajarideni camitta inanabaquijari. Jesocristopa tamine Ponsio-Pirato baccouhaji huadsa pocca ima bicani ecomerajarode. Najarideni pamahapa ohuatti nahatoto tadsa tia ocadossejaro: ¹⁴Occa marinaja nemanehedsa ibora tinaji. Tijine cacajiquimera-gerana. Nema tadsapi madija ohuahadenipa: –Tijinepi pajiranissa tejerani –quina-jarahitohui. Ia Medsede Jesocristo ccani-jaraccadsama denima maride nema tidsanapoji. ¹⁵Jehe, Jesopa Diojine huada najoraponicca bacco tadsa pajissa ccanipomahitohui. Diopa huapima Cacahuade ojarahi. Pohua tohuira etidsedsapi bica tani. Taminedeni huapi taraha pohuana huapimacca tamine deni tojahi ojarihi. Medse cajiridsamanahi huapi taraha pohuana ia Medsede deni tojahi ojarihi. ¹⁶Dio Pohua ojarijari naco jica-jarajari. Pohua madihihuajipi pohua ssiejene dsibehi tajarojine iajiressinijinepi ipajira-gerani. Madija iapi innocodsa Pohua qqui inajarahi. Qqui inahijine ipajira-gerani. Najaridsa ettipi: –iDiopa

bica tahi, epeje! –ihidsanapo nana. Diopa ia Cacahuade deni tojahi nama dsanapohui, onajaro. Pajissa nema nana.

Madija dsepedeni ssequiri najarideni ajama quinahijine

¹⁷Nadsama Jesodsa toquejenajari dsepedeni ssequiri najarideni naco ajijaro dsamacca todsepetaji cajimana, dsinero cajimana nadsapa: –Iapi bicaquiri inani, deni iquejenani –quina-jarahijine huati ticanabaquijo. Pohuadenipa huemani cajimanadsapa: –Najaro-dsana imadi-dsanaponijine ipajirani –quina-jarahijine naco huati ticanabaquijo. Ajana pohuadeni dsepetaji amadsati amossi nani caji tani. Naraha: –Diona ia tohuacahuabaquidi-dsanapohuijine pajirahi –quinahijinena bica tani. Ia huapimapi Diocca danijidsa imadijaro. Icappira-geranijine iadsa accora tajari. Nema nadsapi madija dsepedeni ssequiri najarideni Dio Pohuadsana huatidsemanahi ojari nana, onajaro. ¹⁸Nadsapa pohuadeni mari ticanabaquidsa naqui ajima taji: Madija dsepedeni ssequiri najarideni ima bicanira inanamananijine disseraquiri nana. Accoraquiri nahijinepa bodideni najoramanaha madimanana. Nadsapa pohuadeni cajimanahicca accoraquiri nadsa cappiramanajarideni acco icambaquidi-manahijine da da quinahijine, onajaro. ¹⁹Nema inanamanadsapi pina manaconi imeni memehuaji inahapimanajarossa najaro. Najaropi nidsaranibote pohuadenidsa tojadsapi amossi nejeranitohui. Camittehe jiquejeranicca naqui pohuadenidsa tojanitohui.

**Timoteodsa Pablocca
marinaja jicanicca**

²⁰ Jehe Timoteo, Diocca marinaja tiadsa da inajaro tecahuanissa taji. Madijapa tiadsa: – Ssamo tinani, iana nahatoto inani – quinadsapa najarideni tedseje imahaha ticana- jeraji. Tia tedseje tohuatti ponima- ccadsa ahuaji huati ahuaji huati quinahijineraha poni taji. – Ibodi

nahatoqquri inani – quinaraha pohuadeni bodicca huatohuepi ponimacca. Diocassa nejerani.

²¹ Pohuadeni bodi huatohue ponima- cca tohuini quinadsapa Diocca marinajadsa tohuajimanajari. Jeso- dsa poccadeni jeheniji tossamojaro.

Jehe Diopa tia ticca mamari tabaqquma tiadenidsa ima bicani inanana, onajaro. Epejeni occa ima. Ohua onipi Pablo.